



La sporta turistica ill'elipsa da dschember da l'Hotel Arnica a Scuol es gönüa ingronida cul stabiliment «La Funtana».

FOTO ANDREA BADRUTT

## Surgni alas per svolar e ragischs per tuornar

L'Hotel Arnica ha festagià quist on il 20avel giubileum. Sper il nouv stabiliment «La Funtana» ha la famiglia Zogg realisà un restorant public sco regal d'anniversari. Daspö ils 1. settember porta l'hotel a Scuol eir il certificat da «Design & Lifestyle».

NICOLO BASS/PL

Cur cha's uffants han bandunà lur dachasa per imprender e conquistar il muond, han *Tinetta* e *Hanspeter Zogg* da Scuol tscherchà iün nouv passatemp. Fingià il bap da *Tinetta Zogg* vaiva gönü l'idea da fabrichar üna jada sül tet da la ditta da transports ün pitschen garni. El ha stuvü murir massa bod per realisar seis sömmi. La giuvna matta ha stuvü surtour bainsvelt l'impraisa ed insembe cun seis hom *Hanspeter Zogg* han els pisserà per l'andament ed il svilup da l'affar da transport. Sülla fundamainta da l'anterura garasca han els lura realisà il grond sömmi ed il *Garni Arnica* cun ot stanzas dublas e duos abitaziuns ha drivi dal 2002 las portas. Culla laver d'osp es creschiù eir il plaschair e la paschiun. Ed eir scha's traiss uffants vivavan intant giò la Bassa, nu spargnauna cun ideas e visiuns.

### Cheudouvrarchitectonic

Pel giubileum da desch ons, nempe dal 2012, es segui il cheudouvrarchitectonic, nempe la fabrica da l'elipsa da dschember chi's preschainta in üna lunghezza da 50 meters. Ed eir pel 20avel anniversari es gönü fat ün pass important: Culla chasa «La Funtana» es gönüa ingronida la sporta e l'Hotel Arnica ha surgni üna nouv'entrad. L'hotel dombra intant 33 stanzas e minchüna spordscha als giasts ün evenimaint tuottafat special. Il nouv stabiliment nu porta be il nom «La funtana», dimpèrsè dà al giast l'impreschiun da rivar our dal grip schür in üna stanza clera immez la natüra. E las funtanas cuntschaintas *Emerita*, *Sotsass* e *Sfondraz* nun han be pisserà pel svilup turistic in Engiadina Bassa. Ellas sun eir perdüta da la qualità illas stanzas da la chasa «La Funtana». Dal «pop up» al restorant public. Il nouv stabiliment «La Funtana» es gönü realisà dal 2020. Fingià al principi da l'on 2020 han surtut ils fradgliuns *Martina* e *Domenic Zogg* la gestiun dal hotel modern. Lur ideas sun eir gönüas integradas plainamaing il nouv stabiliment. Per ün'inauguraziun ufficiala nun haja bastü causa la pandemia dal coronavirus. Quista pandemia ha gönü consequenças eir stün otras spartas da la gestiun d'hotel. «Al cumanzainta da decembre 2020 vaina stuvü decider da rivir ün «pop up» restorant. Per la stagiu d'inviern vaina lura chattà ün partenari da la Bassa chi'd ha güdä tuot l'inviern», quinta *Domenic Zogg* da la gronda sfida. Quist «pop up» es lura gönü prolongà fin la fin da la stagiu da stà. «Las bleras bunas experienzas e las bunas reacciuns dals giasts ans han dat curaschi d'investir in üna nouva chadafö professionala e da fabrichar intuorn la sala da culazchun in ün restorant», quinta'l. Quai es lura eir gönü fat in november e decem-



Ils traiss fradgliuns *Andrea*, *Martina* e *Domenic Zogg* sun tuornats da la Bassa per realisar e manar il proget visiunari da l'Hotel Arnica a Scuol.

FOTO MAYK WENDT

**«Il Arnica es adüna stat ün grond proget da famiglia.»**

Domenic Zogg,  
hotelier

ber da l'on passà. Intant es il restorant però stat accessibel be pels giasts d'hotel.

### Certificat «Design & Lifestyle»

D'incourt ha gönü lö ün di da las portas avertas i'l Hotel Arnica a Scuol. Dürant ün di han muossà *Martina* e *Domenic Zogg* cun baja, paschiun e plaschair lur zoja architectonica. Daspö quel di es il restorant eir avert publica-maing. «Sün reservaziun», renda *Martina Zogg* attent. Ils duos giuvens hoteliers rendan eir attent, cha lur sporta turistica es be per creschiüts. Ed amo alch es dal tuottafat nouv: l'Hotel Arnica porta nempe daspö ils 1. settember il label «Design & Lifestyle» chi vain surdat da l'asso-

ciaziun Hotellerie Suisse. Quist certificat vain surdat be ad hotels cun ün'expressiun estetica e cun ün cocept consequant da qualità sur tutot ils servezzans. «Quai es üna grond'onur e nus eschan fich superbis da pudair preschantar quist certificat», disch *Domenic Zogg*.

**Las ragischs d'eiran plü fermas**  
Martina e *Domenic Zogg* sun responsabes per la gestiun. Il frar *Andrea*, chi maina svess amo ün affar da fiduziari a Scuol, s'ingascha ill'administraziun. Tuots traiss fradgliuns sun tuornats da la Bassa ed han chattà in ed intuorn l'Hotel Arnica ün dachasa. «Il Arnica es adüna stat ün grond proget da famiglia», quinta *Domenic Zogg*. Tuots traiss sun fich grats a lur genituors chi han miss la basa per realisar il grond sömmi. «Nus vain surgni alas per svolar e ragischs per tuornar», disch *Martina Zogg*. E quistas ragischs sajan statta uschè fermas, cha tuots traiss han pudü tuornar in Engiadina Bassa cun bleras ideas per l'avegnir. «Ingio ch'ali viadi ans maina in avegnir, nu savaina amo. Evidaint es unic, cha tuot la squadra da l'Hotel Arnica decida, in che direzzion cha la via cuntinuescha», declara *Domenic Zogg*. E quist viadi chi vaiva cumanzà avant 20 ons cul *Garni Arnica*, es hoz üna perla turistica cun bendant üna trentina d'impiegats.

Per lur sporta remarcabla, per lur ideas e lur visiuns ed impüstü eir per lur vöglia da tuornar e lavurar in patria, survegnan ils traiss fradgliuns da l'Hotel Arnica, il buol dad «Engiadina innovativa» sco bun exaimpel in Engiadina.

## VADRETS DA L'ENGIADINA

### Onur scientifica pels vadrets da bloc

Ils vadrets da bloc da l'Engiadina survegnan onur scientifica. Els sun gnüts tschernüts da la renomada Uniun internaziunala of Geological Sciences (IUGS) sco ün dals 100 patrimonis mundials.

In Engiadina daja specialmaing blers vadrets da bloc, per exaimpel il vadret da bloc a Samedan. Cuntrari als vadrets consistan vadrets da bloc in prüma lingia da material da crappa. Ils vadrets da bloc da l'Engiadina sun sco fenomens geologics unics da la Svizra gnüts recepits illa glista «First 100», chi'd es gönüa iniziada be d'incourt. Quai ha comunichà la Società svizra da geomorfologia in lündeschdi. La glista nomna lös geologics e scientifics chi sun d'importanza speciala per l'incletta dal planet terra e da sia istorgia.

### Unics e cun bleras datas

Ch'als vadrets da bloc sajan unics per documentar e perscrutar la dscheta da vart da perits alpins, ha scrit la società geomorfo-



In Engiadina daja fich blers vadrets da bloc, sco per exaimpel il vadret da Muragl a Samedan.

FOTO MAD


logica. In Engiadina daja da quels vadrets specialmaing suvent causa las condizioni climatiche, pervia da l'otezza e pervi da l'erosiun. Ils vadrets da bloc engiadinali vegnan examinats da spö bundant ün tschientiner. Cullas prümas masüraziuns sistematicas da l'on 1987 fuorma ella – tenor la società geomorfologica – la seria da datas la plü lunga chi sta in connex culla dscheta permanenta illas Alps. L'International Union of Geological Sciences (IGS) es gönüa fundata in marz 1961 a Paris. Tenor aignas indicaziuns rapreschainta ella passa ün million scienziats ed es uschea üna da las plü grondas organisaziuns scientificas dal muond. (sda/fmr)

## ZUOZ

### Vernissascha dals texts da Clementina Gilly

La Chasa Editura Rumantscha ho publicho il cudesch «Traunter di e not» cun texts da Clementina Gilly. El cuntegna poesias, essais e raquints.

Clementina Gilly (1858–1942) es steda bain cuntschainta da seis temp, surour ils cunfini da la Rumantschia, scu üna da las unicas poetessas rumantschas. Seu prüma duonna rumantscha ho ella publicho ün agen cudesch. Uossa ho la Chasa Editura Rumantscha (CER) publicho cun «Traunter di e not» ün'ediziun commenteda. Redacziun haun mno *Annetta Ganzoni* e *Rico Valär*. La publicaziun do ün'invista in l'ouvrà e la vita da quista duonna ingascheda pel movimaint rumantsch e pel movimaint da duonans in Engiadina. Il cudesch cuntegna bgeras fotografias da l'album da famiglia e documaints dal temp.



Il frontispizi da la publicaziun. FOTO CER

### Cumbino cun ün di da commemoraziun a Zuoz

La vernissascha da la nouva publicaziun ho lö in sanda, ils 19 da novembre 2022, a las 10.00 in sela cumünela da Zuoz, in connex cun l'occurrenza «commemoraziun per duonna Clementina Gilly». Davo il bivgnaint musical e'l salüd da la vschinauncha, preschiantaro *Rico Valär* la persuna Clementina Gilly e sia ouvrà. *Annetta Ganzoni* preschiantaro correspondenzas e collavuraziun cun Peider Lansel ed oter pü. Sülla maisa da la chesa editura gnaron preschantedas ulterioras publicaziuns da la CER dürant il ultims ans. (cdm/fmr)